



NEWSLETTER

OLIMPIJSKOG KOMITETA BiH



No. 29, mart/april 2025



Poštovani sportisti i sportski radnici,
Poštovani prijatelji,

Sa zadovoljstvom vam predstavljam najnovije izdanje Newslettera Olimpijskog komiteta BiH za mart i april 2025. godine. Ovaj period bio je izrazito dinamičan i ispunjen važnim događajima koji potvrđuju rast i razvoj sportskog sistema u Bosni i Hercegovini, ali i našu kontinuiranu posvećenost strateškim aktivnostima, posebno u pripremama za Olimpijske igre Los Angeles 2028.

U aprilu smo održali 2. Generalnu skupštinu Olimpijskog komiteta Bosne i Hercegovine, na kojoj smo povećali snagu OK BiH za dvije nove članice. Predstavili smo viziju i strateški put prema LA 2028, dok su ključni razgovori sa Ministarstvom kulture i sporta Kantona Sarajevo otvorili važne teme sistemskih rješenja za vrhunski sport u našoj zemlji.

U okviru kontinuiranog rada na razvoju sportskog menadžmenta, završeni su prvi i drugi modul Naprednih kurseva menadžmenta u sportu, što dodatno osnažuje kapacitete administracije sportskih saveza BiH. Posjete i sastanci sa liderima i stručnjacima potvrđuju našu posvećenost međunarodnoj saradnji i stručnom razvoju.

Velik značaj ima i podrška sportskim inicijativama – od zaista uspješnog otvaranja Evropske sedmice sporta u Cazinu do pripreme proslave Olimpijskog dana u Ljubuškom. Osim toga, posebno ističem važan doprinos naših sportskih saveza i reprezentacija, od rezultata mladih sportista do uspjeha naših timova na međunarodnim takmičenjima.

Uvjeren sam da će naši naredni izazovi biti ispunjeni snagom i entuzijazmom koji nosi naša sportska zajednica.

Hvala vam na podršci na našem zajedničkom putu ka razvoju i unaprjeđenju sportskog sistema Bosne i Hercegovine. Iza nas je mnogo uspjeha, a pred nama su novi izazovi i nove prilike za još veći napredak.

S poštovanjem,

Akademik prof. dr Izet Rađo
Predsjednik OK BiH

ODRŽANA 2. GENERALNA SKUPŠTINA OK BIH, OLIMPIJSKI KOMITET BIH BOGATIJI ZA DVIJE ČLANICE

Druga Generalna Skupština OK BiH, na kojoj su jednoglasno usvojeni svi izvještaji uz mnoštvo komplimenata za rad OK BiH prisutnih delegata iz 43 sportska saveza BiH, održana je 22. aprila. Delegati Generalne skupštine su jednoglasno usvojili sve prezentirane izvještaje.



Olimpijski komitet BiH je na sjednici postao bogatiji za dvije članice, Biatlon savez Bosne i Hercegovine i E-sport savez Bosne i Hercegovine. Ovom prilikom, svečano su potpisane pristupnice za članstvo u Olimpijskom komitetu Bosne i Hercegovine. Kompletnu vijest pročitajte na linku [OVDJE](#).

“VIZIJA I PUT KA OLIMPIJSKIM IGRAMA LA 2028”

Nakon 2. sjednice Generalne skupštine, u prostorijama Olimpijskog komiteta BiH održana je panel diskusija pod nazivom “Vizija i put ka Olimpijskim igrama LA 2028” koja je tretirala poziciju i goruće probleme vrhunskog sporta BiH. Na panelu su učestvovali predstavnici sportskih saveza BiH, olimpijci, treneri, sportski stručnjaci, kao i predstavnici relevantnih ministarstava i sponzora.

Panel diskusiju otvorio je uvodnim izlaganjem predsjednik Olimpijskog komiteta BiH, prof. dr. Izet Rađo. U svom izlaganju osvrnuo se na zaključke i efekte prethodnog okruglog stola, koji su jednoglasno doneseni od strane svih sportskih saveza BiH. Ti zaključci odnosili su se na male budžete za sport, kriterije dodjele sredstava, programe za mlade i talentovane vrhunske sportiste i olimpijce, sistem nagrađivanja za ostvareni rezultat, sistem doživotnih naknada za vrhunske rezultate (penzije), kao i na enormna prihodovanja od klađenja na sportske rezultate, koja se u sistem sporta ne vraćaju gotovo nikako ili se vraćaju u obliku “garniture dresova”.



Uvodnu prezentaciju Panela koja govori o trenutnom stanju i eventualnim rješenjima sistemskog finansiranja sporta BiH je prezentirao potpredsjednik Olimpijskog komiteta BiH Davor Komšić.

Panel diskusiju je vodio dr.sci Said Fazlagić, Generalni sekretar Olimpijskog komiteta BiH koji je na osnovu postavljenih pitanja pokušao doći do odgovora i rješenja za situaciju u kojoj se nalazi vrhunski sport u BiH.

Sportisti su bili jasni u svojim zahtjevima iznoseći pojedinačne stavove i izazove sa kojima se susreću u svom razvojnom i sportskom putu ka osvajanju evropskih, svjetskih i Olimpijskih medalja. Kompletnu vijest pročitajte na [ovom linku](#).



MINISTAR MAGODA SA ČELNICIMA OK BIH O YOG-U I ULAGANJIMA U VRHUNSKJE SPORTISTE



U prostorijama Olimpijskog komiteta Bosne i Hercegovine, o trenutnom stanju vrhunskog sporta i sportista u našoj zemlji, razgovarali su ministar sporta i kulture Kantona Sarajevo, Kenan Magoda, predsjednik Olimpijskog komiteta BiH, akademik prof. Izet Rađo, i generalni sekretar OK BiH, doc. dr. Said Fazlagić.

Tema sastanka obuhvatila je sistemsko finansiranje vrhunskog sporta, povećanje budžeta na svim nivoima, kao i strategije za rješavanje ovog gorućeg problema.

Takođe je razgovarano o projektima podrške mladim olimpijskim nadama, potencijalnim i evidentnim olimpijskim kandidatima i olimpijcima.

Posebna pažnja je posvećena razvoju sporta u Sarajevu i Istočnom Sarajevu te obnovi olimpijskih borilišta, što je ključno za podršku budućim uspjesima naših sportista, kao i za organizaciju YOG-a.

OK BIH I MINISTARSTVO KULTURE I SPORTA KANTONA SARAJEVO O SISTEMSKIM RJEŠENJIMA ZA VRHUNSKI SPORT



Delegacija Olimpijskog komiteta Bosne i Hercegovine, predvođena predsjednikom OK BiH akademikom prof. dr. Izetom Rađom i generalnim sekretarom doc. dr. Saidom Fazlagićem, posjetila je u aprilu mjesecu Ministarstvo kulture i sporta Kantona Sarajevo gdje je razgovarano o projektima i sistemskim rješenjima za vrhunski sport kao i nastavku realizacije ideje da Sarajevo i Istočno Sarajevo postanu domaćini YOG-u narednom periodu.

Ministar kulture i sporta Kantona Sarajevo Kenan Magoda kao nekadašnji vrhunski sportista i iskusan sportski radnik, iskazao je puno razumijevanje i podršku prezentiranim projektima koji vode jačanju sportskog sistema Kantona Sarajevo te ostvarenju vrhunskih rezultata naših sportista i timova na međunarodnom planu.

Posebno je podržao ideju organizacije YOG (Olimpijske igre mladih) kojom bi se Grad Sarajevo, Kanton, region i država BiH ponovo vratili na svjetsku olimpijsku scenu.

Sastanku su prisustvovala i Dejana Planinčić i Ema Habul, više stručne saradnice za sport, međunarodne odnose i projekte OK BiH.

NENAD LALOVIĆ U POSJETI OLIMPIJSKOM MUZEJU



Predsjednik Svjetske hrvacke federacije i član Izvršnog komiteta MOK-a Nenad Lalović posjetio je Olimpijski muzej u Sarajevu, a domaćini su mu bili predsjednik Olimpijskog komiteta Bosne i Hercegovine akademik prof. dr. Izet Rađo i generalni sekretar OK BiH doc.dr. Said Fazlagić.

Tokom posjete gospodinu Laloviću je predstavljena ideja i intencija Olimpijskog komiteta da se Sarajevo i Istočno Sarajevo kandiduju za Olimpijske igre mladih (YOG) 2032.

Lalović je potvrdio kako je ovaj termin moguć i realan, i izrazio maksimalnu podršku, te obećao da će se angažovati na promociji ove ideje. Stav MOK-a je da se YOG dodjeljuje onim državama i gradovima koji su prije bili domaćini olimpijskih igara, kazao je predsjednik Svjetske hrvacke federacije i član Izvršnog komiteta MOK-a Nenad Lalović. Gost je obišao Olimpijski muzej izražavajući oduševljenje i ne krijući svoje emocije.



SARADNJA OK BIH I ASA BOLNICE



Olimpijski komitet Bosne i Hercegovine (OK BiH) i ASA Bolnica potpisali su Memorandum o saradnji u cilju jačanja podrške vrhunskim sportistima BiH iz domena zdravstva. Memorandum su u prostorijama OK BiH u Sarajevu potpisali direktor ASA Bolnice prof. Mustafa Hiroš, i predsjednik OK BiH akademik prof. dr. Izet Rađo.

“Ovo je početak uspješne institucionalne saradnje, koja nema samo za cilj promociju naših kompanija, nego prije svega stavlja fokus na vrhunske sportiste i sport uopšte. Cilj Memoranduma je rad na projektima iz oblasti zdravstvene zaštite, prevencije povreda i bolje fizičke spremne sportista sa rekuperacijom, a sve u cilju ostvarivanja vrhunskog rezultata.”, kazao je prof. dr. Rađo.

Vrhunskim sportistima potrebno je posvetiti pažnju, kako bi u kontinuitetu i bez opasnosti za opšte zdravstveno stanje nastavili ostvarivati vrhunske rezultate, te promovisati bh. sport i našu zemlju. Direktor ASA Bolnice prof. Hiroš istakao je činjenicu kako je ostvarena dobra saradnja, te da će zajedno sa OK BiH nastaviti razvijati ovaj oblik saradnje u korist sporta i sportista.

“Meni je posebno drago što smo ovdje u Olimpijskom komitetu i što možemo ponuditi zdravstvene usluge svim sportistima Bosne i Hercegovine, posebno našim olimpijcima i para olimpijcima.”

ASA Bolnica je najsavremenija, a ujedno i jedna od najmlađih u regionu. Prva privatna opća bolnica u Bosni i Hercegovini - ASA Bolnica, obilježava godinu dana uspješnog rada i poslovanja. U proteklih 12 mjeseci, bolnica je postala primjer uspješne sinergije domaćih stručnjaka, inovacija i posvećenosti pacijentima.

ODRŽANI PRVI MODULI NAPREDNIH KURSEVA MENADŽMENTA U SPORTU



U multimedijalnoj sali Olimpijskog komiteta Bosne i Hercegovine, održani su prvi i drugi modul Naprednih kurseva menadžmenta u sportu 2025.

Izdanje Kurasa za 2025. godinu pohađa 17 predstavnika sportskih saveza Bosne i Hercegovine, a radi se o kompleksnom edukativnom programu koji je osmišljen od strane Međunarodnog olimpijskog komiteta, te predstavlja kvalitetnu teoretsko-praktičnu platformu za unapređenje rada sportskih organizacija.

Navedeni edukativni program prati osnovne menadžerske oblasti i trajat će od marta do oktobra mjeseca 2025. godine (7 modula od 2 radna dana). Program kursa je u potpunosti diktiran od strane MOK-a, te je osmišljen u saradnji sa više od 150 svjetski priznatih naučnika i stručnjaka iz sportskog menadžmenta i obuhvata učenje o ključnim kompetencijama neophodnim za uspješno vođenje sportskih organizacija:

- Uvod u Napredne kurseve menadžmenta u sportu
- Uređenje olimpijske sportske organizacije
- Strateško upravljanje
- Upravljanje humanim resursima
- Upravljanje finansijama
- Marketing
- Organizovanje sportskog događaja

Kandidati koji uspješno završe edukaciju će dobiti validnu diplomu Međunarodnog olimpijskog komiteta koja predstavlja prestižnu preporuku za rad u administraciji sportskih organizacija širom svijeta.

VELIKO PRIZNANJE PROF. DR MILANKU MUČIBABIĆU



Počasni predsjednik OK BiH, prof. dr Milanko Mučibabić, svjetski i evropski veteranski judo šampion, promovisan je u Majstora juda 9. DAN od strane Međunarodne judo federacije (IJF)!

Priznanje mu je svečano uručio predsjednik Evropske judo unije (EJU), dr Laszlo Tóth, čime je potvrđen izuzetan doprinos prof. Mučibabića razvoju juda na evropskom i svjetskom nivou. Čestitkama se pridružio i predsjednik Olimpijskog komiteta BiH, prof. dr Izet Rađo, koji je, u ime olimpijske porodice Bosne i Hercegovine, izrazio ponos ovim velikim priznanjem.

Ova prestižna titula kruniše dugogodišnji rad prof. Mučibabića kao sportiste, edukatora i lidera, koji je snažno uticao na razvoj sporta, olimpizma i odgoj brojnih generacija.

Simbol izvrsnosti, posvećenosti i pravih olimpijskih vrijednosti. Ponos Bosne i Hercegovine!



IZVJEŠTAJ O RADU OK BIH 2023 - 2024



Olimpijski komitet Bosne i Hercegovine je u aprilu mjesecu publikovao Izvještaj o radu za mandatni period 2023 - 2024.

U navedenom periodu, OK BiH je dao značajan doprinos promociji olimpijskih vrijednosti i pružanju podrške našim sportistima, a predanost OK BiH izgradnji snažne sportske zajednice ostaje nepromijenjena.

Olimpijski timovi su u ovom periodu učestvovali na četiri međunarodna višesportska takmičenja:

- Ljetni EYOF Maribor 2023
- Mediteranske igre na pijesku Heraklion 2023
- Zimski YOG Gangwon 2024
- Ljetne olimpijske igre Pariz 2024

Kompletan Izvještaj možete pogledati na [OVOM LINKU](#).

MEĐUNARODNI DAN SPORTA ZA RAZVOJ I MIR



Organizacija Mir i Sport pozvala je međunarodnu zajednicu da se uključi i podigne #WhiteCard za 460 miliona djece čiji su životi pogođeni sukobima. Simboličan gest koji ističe potrebu da sport za mir postane prioritet.

Ovaj dan je ustanovljen od strane Generalne skupštine Ujedinjenih nacija 2013. godine kako bi se prepoznala moć sporta u promovisanju pozitivnih društvenih promjena, razvoja zajednica i podsticanju mira i razumijevanja širom svijeta. Upravo te vrijednosti, mir, razvoj, solidarnost, inkluzija i jednakost, duboko su utkane u viziju i misiju Olimpijskog komiteta Bosne i Hercegovine.

Misija OK BiH jeste da, kroz snagu sporta, doprinosi izgradnji zdravijeg, pravednijeg i miroljubivijeg društva, ne samo u BiH, već i šire. Danas, više nego ikada, prepoznamo sport kao most između razlika, kao platformu za dijalog i alat za stvaranje zajedničke budućnosti.

PREDSJEDNIK ZDRAVSTVENE KOMISIJE OK BIH U RADNOJ POSJETI OK BIH



Predsjednik Zdravstvene komisije Olimpijskog komiteta BiH, dr. Semin Bećirbegović, boravio je u radnoj posjeti u Olimpijskom komitetu BiH.

U skladu sa odlukom Izvršnog komiteta OK BiH, počele su pripreme za organizaciju seminara sportske medicine pod radnim nazivom "Sport i srce", koji bi se trebao održati krajem maja.

Tokom posjete, dogovoreni su naredni koraci i dinamika organizacionih priprema Seminara, kao i datum održavanja naredne sjednice Zdravstvene komisije OK BiH na ovu važnu temu.

Ovaj seminar predstavlja ključan korak u unapređenju svijesti i znanja o sportu i zdravlju, te podržava našu misiju promovisanja sporta i wellnesa u Bosni i Hercegovini.

RADNI SASTANAK OK BIH I KJP ZOI '84



U prostorijama OK BiH, predsjednik akademik prof. dr Izet Rađo i generalni sekretar doc. dr Said Fazlagić ugostili su generalnog direktora KJP ZOI '84, Jasmina Mehića, i rukovodioca OC Zetra, Seja Bukvu.

Odlični odnosi KJP ZOI '84 i krovne sportske organizacije OK BiH su višedecenijski, a oni se ogledaju i u konstantnim i aperiodičnim sastancima sa ciljem jačanja ionako dobre saradnje dvije sestrinske organizacije pod jednim krovom OC Zetra.

Razgovori su vođeni o raznim temama i tekućim pitanjima, sa fokusom na kandidaturu Sarajeva i Istočnog Sarajeva za YOG (Svjetske olimpijske igre mladih), organizaciju velikih sportskih takmičenja uz korištenje kapaciteta i borilišta kojim gazduje ZOI '84, korištenje ovih kapaciteta od strane vrhunskih sportista i sportskih saveza BiH, kao i održavanja i modernizacije prostorija u kojima su smještene ove dvije organizacije.

GENERALNI SEKRETAR DOC. DR. SAID FAZLAGIĆ U JUTRU ZA SVE BHRT-A O FINANSIRANJU VRHUNSKOG SPORTA U BIH



GLEDATE "JUTRO ZA SVE"

Generalni sekretar Olimpijskog komiteta Bosne i Hercegovine, doc.dr. Said Fazlagić, bio je gost "Jutra za sve", Radiotelevizije BiH.

U razgovoru je ukazao na važnost nedavne panel diskusije održane u prostorijama OK BiH, koja se odnosila na finansiranje vrhunskog sporta i sportista u BiH - "Vizija i put ka Olimpijskim igrama LA 2028".

Ova tema je od izuzetnog značaja za razvoj sporta u našoj zemlji, a dr. Fazlagić je istaknuo ključne aspekte koje treba

razmotriti kako bismo podržali naše sportiste na putu ka uspjehu. OK BiH nastavlja podržavati naše sportiste i vrhunski sport! Emisiju pogledajte na [ovom linku](#).

NAJAVA OVOGODIŠNJEG OBILJEŽAVANJA OLIMPIJSKOG DANA: OLYMPIC DAY 2025 LJUBUŠKI - VODOPAD KRAVICA



I ove godine, Olimpijski komitet Bosne i Hercegovine organizuje manifestaciju koja proslavlja olimpizam u našoj zemlji - "Olympic Day 2025"!

Duh olimpizma širimo blizu Ljubuškog, na predivnom Vodopadu Kravice, krajem maja 2025. godine. Na sastanku razgovarali smo o ovoj manifestaciji, uz prisustvo našeg generalnog sekretara OK BiH, doc. dr. Saida Fazlagića, gradonačelnika Grada Ljubuškog, Vedrana Markotića, predsjedavajućeg gradskog vijeća, Tihomira Kvesića, i člana IKOK-a, Ivana Brkića.

Olimpijski komitet BiH ima jedinstveni cilj - promovirati Olimpijski duh širom gradova Bosne i Hercegovine.

Olimpijski dan, predstavljen 1948. godine, slavi rođenje modernih Olimpijskih igara i poziva sve da se uključe u sport, bez obzira na godine, spol ili fizičku sposobnost.

Pridružite nam se na ovom posebnom danu i budite dio globalnog pokreta!

LANA PUDAR NASTAVLJA USAVRŠAVANJE SA NAJBOLJIM SVJETSKIM PLIVAČKIM TIMOM



U prostorijama Olimpijskog komiteta Bosne i Hercegovine održana je konferencija za novinare naše olimpijke i najbolje plivačice Lane Pudar.

Najbolja bosanskohercegovačka plivačica će svoju plivačku karijeru i obrazovanje nastaviti na Univerzitetu Virdžinija (The University of Virginia).

Za njenu plivačku karijeru biće zadužen gospodin Todd DeSorbo, glavni trener plivačkog tima na The University of Virginia, kao i glavni trener američke ženske reprezentacije.

Pored Lane na konferenciji za novinare obratili su se i predsjednik Olimpijskog komiteta BiH akademik prof. dr. Izet Rađo, i trener i menadžer Lane Pudar, prof. dr. Damir Đedović. Akad. prof. dr. Izet Rađo u svom obraćanju je istakao kako je Lana do sada pokazala šta znači rad, odricanje i ljubav prema domovini, a svojim rezultatima donijela je Bosni i Hercegovini neizmjernu radost i ponos.

“Ali danas, uz ponos, osjećamo i gorčinu. Jer Lana Pudar, šampionka koja je nosila ime Bosne i Hercegovine širom svijeta, svoju karijeru mora nastaviti van granica svoje domovine, u potrazi za onim što ovdje nije imala: bazen u njenom rodnom gradu Mostaru, i ozbiljan sportski ambijent,” naglasio je prof.dr. Rađo. Predsjednik Olimpijskog komiteta BiH, prof.dr. Rađo završio je svoje obraćanje porukom da Bosna i Hercegovina ima talente, ima šampione, ima srce.

Kompletnu vijest pročitajte [OVDJE](#).

OK BIH PODRŽAO ZAKIRU PUŠINU SA 10.000 KM



Odlukom Izvršnog komiteta Olimpijskog komiteta BiH, mlada sportistkinja Zakira Pušina, prvakinja i viceprvakinja Evrope u streljaštvu, uvrštena je u Program+ OK BiH sa podrškom u iznosu od 10.000 KM.

Ovim povodom, predsjednik OK BiH akademik prof. dr. Izet Rađo i generalni sekretar doc. dr. Said Fazlagić primili su Zakiru Pušinu i predsjednika SK Sarajevo Guso Emira u Olimpijskom komitetu BiH. Uz čestitke za postignute rezultate i podršku OK BiH, poželili su puno sreće u nastavku sportske karijere.

Sredstva Programa+ namijenjena su za trenažni proces, pripreme i nastupe na takmičenjima u 2025. godini.

SPORTSKI SAVEZI BOSNE I HERCEGOVINE

VICO ZELJKOVIĆ OSTAJE NA ČELU NS/FS BIH



Na izbornoj sjednici Generalne skupštine Nogometnog/Fudbalskog saveza BiH, održanoj u Neumu, Vico Zeljković je jednoglasno izabran za predsjednika za naredne četiri godine!

Delegati su istakli važnost njegovog vođenja u razvoju bh. fudbala, a sjednici su prisustvovali i gosti iz FIFA-e i UEFA-e, koji su pohvalili trenutnu saradnju i uspjehe naših reprezentacija.

Uz predsjednika, izabrani su i novi članovi Izvršnog odbora. Više na linku [ovdje](#).

NF/FS BIH PO PRVI PUT UGOSTIO 12 SAVEZA, ČLANICA UEFA-E

NF/FS BiH je po prvi put imao čast ugostiti visoke zvaničnike iz 12 nogometnih/fudbalskih saveza članica UEFA. Sastanak se održao u Sarajevu, gdje su se okupili predsjednici i generalni sekretari iz jugoistočne Evrope.

Među prisutnima bili su i najviši zvaničnici UEFA, predvođeni predsjednikom Aleksanderom Čeferinom i direktorom nacionalnih asocijacija Zoranom Lakovićem.

Predsjednik NS/FS BiH i aktuelni potpredsjednik Olimpijskog komiteta BiH, Vico Zeljković, otvorio je sastanak naglašavajući važnost regionalne saradnje u razvoju nogometa. Uz veliku zahvalnost UEFA-i na njihovoj podršci, posebno kroz HatTrick program, izrazio je želju da zajedno ojačaju status država unutar UEFA. Ovaj sastanak dodatno potvrđuje ugled NS/FS BiH na međunarodnoj fudbalskoj sceni i uspješno vođstvo predsjednika Vico Zeljkovića!



U sklopu događaja predsjednik N/FS BiH Vico Zeljković i predsjednik UEFA-e Aleksander Čeferin sastali su se sa predsjedavajućom Predsjedništva BiH, Željkom Cvijanović, kao i savjetnicima druga dva člana Predsjedništva BiH. Ovaj sastanak predstavlja značajan korak ka jačanju saradnje između UEFA-e, Nogometnog/Fudbalskog saveza BiH i državnih institucija, s ciljem unapređenja fudbalske infrastrukture i kvaliteta takmičenja u našoj zemlji.

Pored Zeljkovića i Čeferina, prijemu su prisustvovali UEFA direktor nacionalnih asocijacija Zoran Laković, te potpredsjednici NS/FS BiH Ivan Beus i Irfan Durić i generalni sekretar Adnan Džemidžić.

DOGOVORENI PRINCIPI OBJEDINJENJA ENTITETSKIH I DRŽAVNOG HRVAČKOG SAVEZA



Na sastanku subjekata hrvačkog sporta kojim su predsjedavali predsjednik Svjetske hrvačke federacije i član Izvršnog komiteta MOK-a, Nenad Lalović i predsjednik Olimpijskog komiteta Bosne i Hercegovine, akademik prof. dr. izet Rađo, dogovoreni su principi objedinjenja entitetskih i državnog saveza, a za dobrobit bh. sportista i hrvanja kao sporta.

Doneseni su zaključci koji su jednoglasno podržani.

Ovim zaključcima, nakon dobijanja neophodnih registracija kod nadležnih ministarstava, slijedit će i skidanje suspenzije Hrvачkom savezu BiH u članstvu OK BiH, te će biti podržani sportisti, treneri, menadžment i infrastruktura subjekata hrvačkog sporta.

Sastanak je održan u prostorijama Olimpijskog komiteta Bosne i Hercegovine u Sarajevu.

POSJETA GENERALNOG SEKRETARA SANKAŠKOG SAVEZA BOSNE I HERCEGOVINE

U Olimpijskom komitetu Bosne i Hercegovine, akademik prof. dr. Izet Rađo i generalni sekretar doc. dr. Said Fazlagić ugostili su Igora Špirića generalnog sekretara Sankaškog saveza Bosne i Hercegovine.

Sastanak je protekao u duhu zajedničkog razumijevanja, saradnje i vizije za budućnost. Tokom sastanka istaknuto je da uspješan rad saveza predstavlja neprocjenjiv doprinos sportskoj zajednici Bosne i Hercegovine te inspiraciju za mnoge mlade sportiste.



Olimpijski komitet sa zadovoljstvom ističe svoju spremnost da pruži svu potrebnu podršku savezu, kako u njihovim trenutnim naporima tako i u realizaciji budućih projekata. Pružanje resursa, savjetodavna pomoć te zajednički rad na unapređenju infrastrukture i obezbjeđivanju boljih uslova za treniranje sportista samo su neki od koraka koje ćemo preduzeti kako bismo osigurali uspjeh Sankaškog saveza.

“Predanost Sankaškog saveza Bosne i Hercegovine u ovogodišnjoj sezoni na aktivnostima i promociji ovog sporta na domaćoj i međunarodnoj sceni impresivna je. Olimpijski komitet Bosne i Hercegovine će uvijek stajati uz takve aktivnosti i podržavati ih u njihovim naporima da sportski duh i vrijednosti podignu na viši nivo,” izjavio je akademik prof. dr. Izet Rađo predsjednik Olimpijskog komiteta.

Ova posjeta predstavlja samo početak čvršće saradnje između Olimpijskog komiteta i Sankaškog saveza, usmjerene ka zajedničkom cilju, “razvoju sporta, promociji mladih talenata i postizanju vrhunskih rezultata na međunarodnoj sceni.”

POVIJESNI ISKORAK ZA BOSNU I HERCEGOVINU U SVJETSKOM BICIKLIZMU



Toni Zorić, predsjednik Biciklističkog saveza BiH, izabran je za delegata koji će predstavljati Europu na Kongresima Svjetske biciklističke federacije (UCI) u naredne četiri godine!

Ovo je prvi put da Bosna i Hercegovina ima svog predstavnika na ovako visokom nivou.

Toni je istaknuo: „Imamo priliku stvoriti bolje uvjete za razvoj biciklizma i omogućiti našim sportašima da se natječu na najvećim svjetskim utrka.“

Ovaj izbor je značajan korak za biciklizam u našoj zemlji! Čestitke predsjedniku Biciklističkog saveza BiH gospodinu Zoriću.

MARKO MARTINOVIĆ: STEČENO ZNANJE PRENIJET ĆU U BIH

Mladi i perspektivni biciklistički trener iz Travnika, Marko Martinović, oglosio se nakon što je po prvi put otišao u prestižni Svjetski biciklistički centar (WCC) u Aigleu, Švicarska, na edukaciju za UCI licencirane trenere!

Zahvaljujući podršci Olimpijskog komiteta Bosne i Hercegovine (OK BiH) i Biciklističkog saveza Bosne i Hercegovine (BiSa BiH), imao sam čast sudjelovati u edukativnom programu Svjetskog biciklističkog centra (WCC) u Aigleu, Švicarska, kazao je on.

“Tokom četverotjednog boravka prošao sam kroz intenzivna predavanja i praktične radionice koje su vodili vrsni profesori sa svjetskih univerziteta te olimpijci, a teme su obuhvatale različite aspekte trenerskog posla u biciklizmu. Uz to, posjetio sam Međunarodni olimpijski komitet (IOC) i Olimpijski muzej u Lausanne, gdje sam imao priliku upoznati i ostvariti kontakte s vodećim stručnjacima iz svijeta sporta i biciklizma.”

Posebna vrijednost ove edukacije bila je saradnja i razmjena iskustava s nacionalnim biciklističkim trenerima iz 14 različitih zemalja sa svih pet kontinenata. Upoznavajući njihove metode rada, kulture i pristupe sportistima, stekao sam uvid u raznolikost biciklističkih praksi širom svijeta, naglasio je Martinović. Pročitajte više [OVDJE](#).



MLADA BICIKLISTIČKA REPREZENTACIJA BOSNE I HERCEGOVINE NA TRENING KAMPU U ČAPLJINI



Čapljina je u aprilu mjesecu bila domaćin mladoj biciklističkoj reprezentaciji Bosne i Hercegovine, koja je boravila na intenzivnim pripremama u sklopu trenažnog kampa. Nastavljajući uspješan projekt okupljanja djece i mladih sportaša, koji se posljednje tri godine održavao u Mostaru, ove godine kamp po prvi put seli na novu lokaciju, s ciljem promicanja sporta i turizma u raznim dijelovima zemlje.

Kamp se realizira kroz UCI Solidarity projekt uz podršku Olimpijskog komiteta Bosne i Hercegovine i Međunarodne biciklističke federacije UCI. Ove godine zabilježen je rekordan odaziv sudionika, s čak 40% više prijavljenih u odnosu na prethodne godine, što potvrđuje rastuću popularnost ovog projekta. Ovaj kamp predstavlja važan korak u razvoju mladih sportaša, te Biciklistički savez BiH nastavlja s misijom poticanja sportskog duha, timskog rada i biciklizma kao važnog dijela aktivnog načina života. Kompletnu vijest pročitajte [OVDJE](#).

PREDSTAVNICI STRELJAČKOG SAVEZA BIH U POSJETI OK BIH



U prostorijama Olimpijskog komiteta BiH održan sastanak između čelnika Olimpijskog komiteta i delegacije Streljačkog saveza BiH. Predsjednik OK BiH, prof.dr Izet Rađo, potpredsjednik Davor Komšić i generalni sekretar doc.dr Said Fazlagić srdačno su dočekali predsjednika Sakiba Plančića, potpredsjednika Predraga Rakića, predsjednika Stručno-takmičarske komisije Nevena Rašića i predsjednika Nadzornog odbora Nijaza Šahinovića.

Na sastanku su razmatrane ključne aktivnosti i naredni koraci u saradnji između Olimpijskog komiteta BiH i Streljačkog saveza BiH. "Naš cilj je unaprijediti streljaštvo u Bosni i Hercegovini i kroz zajednički rad ostvariti značajne rezultate," istaknuli su članovi delegacije.

PREDSTAVNICI ATLETSKOG SAVEZA BIH U POSJETI OK BIH



U prostorijama Olimpijskog komiteta BiH održan susret između predstavnika Olimpijskog komiteta i delegacije Atletskog saveza BiH. Predsjednik OK BiH, prof.dr Izet Rađo, potpredsjednik Davor Komšić i generalni sekretar doc. dr Said Fazlagić srdačno su dočekali predsjednika Duška Ivičića i generalnog sekretara Mehmeda Lokmića.

Predsjednik Duško Ivičić izjavio je: "Nova uprava Atletskog saveza BiH posvećena je unapređenju atletike u našoj zemlji

i raduje nas suradnja s Olimpijskim komitetom BiH!"

Prof. dr Izet Rađo čestitao je Ivičiću: "Vaš izbor na mjesto predsjednika Atletskog saveza BiH je potvrda povjerenja u Vaše sposobnosti, a Olimpijski komitet je spreman podržati nadolazeće projekte i inicijative. Zajedno možemo postići velike stvari!"

Ova posjeta naglašava važnost zajedničkog rada na projektima koji će donijeti napredak za bosanskohercegovačku atletiku.



USPJEŠNO ZAVRŠEN COUNCIL MEETING UZ POHVALE EUROPEAN ATHLETICS



U prisustvu najviših predstavnika evropske atletike, uspješno je završen Council Meeting European Athletics, koji je po prvi put održan u Bosni i Hercegovini. Događaj je protekao u izuzetno pozitivnoj atmosferi, a domaćin – Atletski savez BiH – predstavio se na najvišem nivou.

Jedan od ključnih trenutaka bio je prezentacija Atletskog saveza Bosne i Hercegovine, koju su vodili predsjednik ASBiH Duško Ivičić i Generalni sekretar Mehmed Lokmić. Svi članovi Council-a izrazili

su veliko zadovoljstvo prikazanim sadržajem, ističući profesionalnost i posvećenost razvoju atletike u BiH. Prezentacija je ostavila snažan utisak i dodatno učvrstila ugled Atletskog saveza BiH unutar evropske atletske zajednice. U znak zahvalnosti i međusobne saradnje, predsjednik Ivičić ispred Atletskog saveza BiH, uručio je posebno priznanje predsjedniku European Athletics, g. Dobromiru Karamarinovu, za njegovu kontinuiranu podršku i doprinos razvoju atletike na evropskom nivou. Također, European Athletics je domaćinima uručio priznanje kao znak zahvalnosti za izvrsnu organizaciju i gostoprimstvo tokom cijelog događaja. Ovaj susret predstavlja značajan korak naprijed i prilike za niz sastanaka na najvišem nivou za atletsku zajednicu BiH i potvrđuje da domaći savez ima kapacitete i znanje da bude pouzdan partner na evropskoj sportskoj sceni.

PRIPREME PLIVAČA PK SPORT TIME ZA REPREZENTATIVNE NASTUPE



Plivači PK Sport Time započeli su pripreme za reprezentativne nastupe u nadolazećoj sezoni na visinskom kampu u Olimpijskom centru Turskog plivačkog saveza u Erzurumu. Na nadmorskoj visini od 2000 metara, u idealnim uslovima za trening, vrijedno rade kako bi ostvarili vrhunske rezultate na međunarodnoj sceni.



U ekipi se nalazi Iman Avdić, koja se priprema za nastupe na Svjetskom seniorskom prvenstvu u Singapuru, kao i na Evropskom i Svjetskom juniorskom prvenstvu u Slovačkoj i Rumuniji. Pored nje, Zerina Vrabac trenira za nastupe na Evropskom olimpijskom festivalu mladih (EYOF) u Sjevernoj Makedoniji i Svjetskom juniorskom prvenstvu u Rumuniji. Arian Kadić će predstavljati Bosnu i Hercegovinu na Svjetskom i Evropskom juniorskom prvenstvu. Timu se pridružio i Ali Čorbo, kojeg očekuju nastupi na jakim međunarodnim plivačkim mitinzima.

Kamp, koji traje 22 dana, organizovan je u saradnji s reprezentativcima Hrvatske iz HAPK Mladost Zagreb i PK Olimp Zabok. Trenažni proces vode iskusni treneri Evelin Avdić, Ivica Androidić i Lovrenco Franičević, koji sa sportistima rade na unapređenju fizičke spreme i tehničke pripreme za predstojeće izazove.

Ova visinska baza predstavlja odličnu priliku za plivače da u izuzetnim uslovima dodatno unaprijede svoje performanse i sa optimizmom krenu u takmičarsku sezonu. Svi članovi ekipe motivisani su i posvećeni ostvarivanju vrhunskih rezultata na prestižnim međunarodnim takmičenjima.

CHEERLEADING PRVENSTVO BOSNE I HERCEGOVINE

23.03.2025. godine u Sportskoj dvorani u Gacku održano je Cheerleading prvenstvo Bosne i Hercegovine za uzrast mlađih kadeta, kadeta, mlađih juniora, juniora i seniora. Prvenstvo su sudili licencirani ICU suci iz Mađarske, Italije i Austrije. Dvorana u Gacku bila je premala za sve one koji su željeli gledati prvenstvo, iako je prvenstvo trajalo cijeli dan u publici mjesta nije bilo. Cheerleading sport zbog svoje atraktivnosti privlači velik broj kako sportaša tako i publike. Na prvenstvu je sudjelovalo 8 gradova iz Bosne i Hercegovine, a samo prvenstvo započelo je u 13H te završilo iza 21H. Najbolji sportaši sa prvenstva dobili su pravo da predstavljaju Bosnu i Hercegovinu na Evropskom prvenstvu koje se krajem lipnja održava u Sloveniji. Cheerleading sport je proslavio 15 godina postojanja u Bosni i Hercegovine te povodom toga Cheerleading savez Bosne i Hercegovine je nagradio sportašice koje su najviše puta sudjelovale na prvenstvu Bosne i Hercegovine, riječ je o Nikolini Čolak i Mihaeli Zeljko članicama Hrvatskog cheerleading kluba Široki. Domaćin prvenstva bio je Cheerleading klub We Dance Gacko. Na samom prvenstvu sudjelovali su i cheerleading sportaši s posebnim potrebama čiji nastup je izazvao oduševljenje svih prisutnih u dvorani.



NEDIM MAŠIĆ IZABRAN ZA POTPREDSJEDNIKA EWF



Na izborima za Evropsku federaciju dizanja tegova (EWF), koji su održani u Moldaviji, Nedim Mašić je izabran za potpredsjednika EWF-a, što je veliko priznanje za Generalnog sekretara Balkanske federacije.

Takođe, Enisa Masić je jednoglasno izabrana u EWF Coaching&Research Committee.

SAMIR ŠARIĆ IZABRAN ZA ČLANA UPRAVNOG ODBORA EVROPSKE TAEKWONDO UNIJE

Unjemačkom Nürnbergu je održano posljednje zasjedanje, sada već starog, Upravnog odbora Evropske taekwondo unije čiji je član bio i Samir Šarić, član predsjedništva Taekwondo saveza BiH i predsjednik Taekwondo saveza FBiH.

Nakon usvojenog izvještaja za 2024. godinu održana je Izborna skupština Evropske taekwondo unije na kojoj su izabran novi predsjednik, četiri potpredsjednika i 14 članova Upravnog odbora.

Podršku da nastavi obnašati predsjedničku funkciju dobio je dosadašnji predsjednik Sakis Pragalos.

Elektronskim glasanjem novi mandat u Upravnom odboru Evropske taekwondo unije povjeren je i Samiru Šariću, članu predsjedništva TKDSBiH i predsjedniku TKDSFBiH. Natpolovičnom većinom od ukupno 62 delegata koja su imala pravo glasa, Šarić je među ukupno 26 kandidata dobio povjerenje i mjesto u Upravnom odboru ETU-a u naredne četiri godine.

Delegat s pravom glasa ispred Taekwondo saveza Bosne i Hercegovine na Izornoj skupštini bila je Mirela Mujović.



ODRŽAN SEMINAR I POLAGANJE ZA NACIONALNE SUTKINJE RITMIČKE GIMNASTIKE



Gimnastički savez BiH je 15. marta 2025. godine održao seminar i polaganje za Nacionalne sutkinje ritmičke gimnastike. Seminar i polaganje se održalo u Univerzitetskom centru Banja Luka, a predavač i ispitivač je bila certificirana međunarodna sutkinja Dragana Terzić.

Poslije polaganja Gimnastički savez BiH je dobio 13 Nacionalnih sutkinja ritmičke gimnastike nivoa I, II i III.

PRIPREME BIH REPREZENTACIJE U AZERBEJDŽANU

Na temelju Memoranduma o međusobnom razumijevanju i saradnji između Gimnastičkog saveza Bosne i Hercegovine i Gimnastičkog saveza Azerbajdžana, državne reprezentativke BiH, zajedno sa trenerima, boravile su u Bakuu, glavnom gradu Azerbajdžana, gdje su odradile važan dio priprema za nadolazeću sezonu.



Tokom boravka u Bakuu, naše gimnastičarke su imale priliku da sarađuju sa vrhunskim trenerima iz Azerbajdžana, što je za naš tim bilo izuzetno vrijedno iskustvo. Ove pripreme omogućile su im da usavrše tehničke elemente, razumiju nove metodologije treninga i steknu dragocjene uvide u svjetske trendove u gimnastici. Ovakav oblik saradnje između dva saveza dodatno doprinosi razvoju i jačanju kapaciteta naših sportista i trenera na međunarodnom nivou.

“Puno hvala Gimnastičkom savezu Azerbajdžana koji nam je omogućio ove korisne i kvalitetne pripreme,” izjavila je predsjednica Gimnastičkog saveza BiH, Renee Starčević. “Ovakvi susreti i razmjena iskustava veoma su važni za dalji napredak naših sportistkinja i za promociju gimnastike u našoj zemlji.”

Ove pripreme predstavljaju važan korak u pripremanju za nadolazeće takmičenje i svjedoče o predanosti i razvoju gimnastike u Bosni i Hercegovini, uz podršku prijateljskog saveza iz Azerbajdžana. Slične inicijative dodatno osnažuju saradnju i solidarnost među ekipama i zemljama, te doprinose jačanju sportskog prijateljstva na međunarodnom nivou.

BIH TEAM

ZLATO ZA ELVEDINU MUZAFERIJU!



Najbolja bh. skijašica, olimpijka Elvedina Muzaferija, osvojila je prvo mjesto na Super G utrci Evropa kupa u Norveškoj! Elvedina je startala kao 31., i na kraju je bila za 41 stotinku brža od drugoplasirane Italijanke Sare Thaler.

Ova utrka bila je posljednja Super G utrka sezone Evropa kupa, a Elvedina je sezonu završila sa 115 osvojenih bodova, plasiravši se na 20. mjesto u ovom takmičenju. Čestitke našoj Elvedini!

STRAHINJA ERIĆ OTVORIO KVOTU ZA BIH ZA ZOI MILANO CORTINA 2026

Strahinja Erić je nastupio na Svjetskom prvenstvu u Trondheimu, Norveška, gdje je otvorio kvotu za Bosnu i Hercegovinu za Olimpijske igre Milano Cortina 2026!

U disciplini sprint, osvojio je impresivnih 147,24 FIS boda!

Čestitke Strahinji na postignuću i srećno na narednim takmičenjima!



NOVI DRŽAVNI REKORD ZA TARIKA OMERAGIĆA



Najbolji bh. brzoklizač, Tarik Omeragić, uz podršku Saveza klizačkih sportova BiH i OK BiH, nastupio je na Svjetskom seniorskom prvenstvu u brzom klizanju, koje je održano od 14. do 16. 3. Pekinga. U konkurenciji 60 najboljih brzoklizača svijeta, koji su i kandidati svojih država za kvalifikacije za nastup na ZOI 2026, Tarik je u svim disciplinama imao dobar nastup. Na 1000 m zauzeo je 38. mjesto sa vremenom 1.26.610, a na 500 m postavio je novi državni rekord u vremenu 0:41.862.

VRHUNAC KADETSKE KARIJERE ANURA MEHIĆA

Bosanskohercegovački skijaš Anur Mehić ostvario je sjajan rezultat osvajanjem prvog mjesta u slalomu (U16) na prestižnom takmičenju Whistler Cup Children FIS!

Ova pobjeda nije samo vrhunac njegove kadetske karijere, već i veliki korak na putu prema seniorskom takmičenju, budući da Anur od naredne sezone prelazi u FIS seniorski program. Anur je pobijedio s prednošću od 1.45 sekundi ispred drugoplasiranog Švicarca Nine Berlingera i trećeplasiranog Kanađanina Adriana Cote. Kroz svoje godine skijanja, Anur je izgradio reputaciju jednog od najtalentovanijih mladih skijaša, sa preko 90 pobjeda u skijaškom kupu BiH i impresivnim rezultatima na svjetskim takmičenjima.



SJAJAN POČETAK “ZMAJEVA” NA KVALIFIKACIJAMA ZA SP 2026



Fudbalska reprezentacija je u martu mjesecu upisala dvije važne pobjede u prvom kolu grupe H kvalifikacija za Svjetsko prvenstvo.

Zmajevi su u Bukureštu savladali Rumuniju rezultatom 1:0, nakon čega su ostvarili pobjedu nad reprezentacijom Kipra s 2:1 na Bilinom polju.

Ovim trijumfom Zmajevi su preuzeli lidersku poziciju u grupi H sa šest bodova iz dva susreta. Selektor Bosne i Hercegovine Sergej Barbarez zadovoljan je zbog pobjede, i kazao je kako smo favoriti

u naredna dva meča protiv San Marina, ali ponovo je podvukao kako ne voli pričati o ulozi favorita.

Predsjednik Fudbalskog saveza Bosne i Hercegovine (FSBiH) Vico Zeljković istakao je kako je prvi korak napravljen.

“Vjerovali smo, nadali se, planirali i radili smo za ovaj trenutak – za ovih šest bodova. Malo ko je vjerovao, ali smo znali da mi imamo kvalitet za taj rezultat. Nakon više od 10 godina smo vezali dvije pobjede na početku kvalifikacija, što samo po sebi govori o vrijednosti ovog rezultata.”

Bosna i Hercegovina narednu utakmicu igra 7. juna protiv San Marina. Našim reprezentativcima želimo puno sreće, a sve čestitke upućujemo selektoru Barbarezu, direktoru Spahiću, svim reprezentativcima i članovima reprezentacije, i N/FS Bosne i Hercegovine.

KVALIFIKACIJE EURO: RUKOMETAŠICE BIH POBIJEDILE VELIKU BRITANIJU

U spektakularnoj utakmici u tuzlanskom Mejdanu, rukometašice Bosne i Hercegovine su pobijedile Veliku Britaniju rezultatom 25:15 i plasirale se u drugu fazu kvalifikacija!

BiH drži prvo mjesto u grupi sa 4 boda. Evropski šampionat za rukometašice zakazan je od 3. do 20. decembra 2026. u pet država domaćina: Poljskoj, Rumuniji, Češkoj, Slovačkoj i Turskoj!

Čestitke rukometašicama, stručnom štabu i Rukometnom savezu Bosne i Hercegovine.



Foto: Jasmin Duvnjaković/RSBiH/SPORT1

EJLA MAKAŠ I ANJA HRGIĆ ZLATNE NA EP, DVA PEHARA ZA BIH

Na Otvorenom Evropskom juniorskom prvenstvu za taekwondoiste u olimpijskim kategorijama, koje je od 14. do 16. marta održano u Bukureštu, Bosna i Hercegovina je osvojila dvije zlatne medalje.

Ejla Makaš, nakon zlata na Slovenia Open-u, osvojila je još jedno zlato pobijedivši u kategoriji do 49 kg s četiri pobjede, dok je Anja Hrgić osvojila zlato u kategoriji do 63 kg. TKD Novi Grad zauzeo je prvo mjesto u ženskoj konkurenciji i drugo ukupno.



USPJEŠAN TAEKWONDO TURNIR U SKOPLJU



Bosanskohercegovački seniori Benjamin Husić i Džejla Makaš osvojili su medalje na prestižnom turniru Skopje Ramus E1/G1! Husić je osvojio srebrnu u kategoriji do 74 kg, a Makaš se okitila bronzom u kategoriji 46 kilograma.

BiH juniori takođe su bili sjajni – osvojili su 5 medalja! Kadetska ekipa postigla je sjajne rezultate sa 11 medalja! Ovaj turnir je bio odlična prilika da se bh. kadeti dokažu pred pripreme za Svjetsko prvenstvo u Fujairahu!

ŠEST MEDALJA I TRI PEHARA ZA BIH NA KLUPSKOM EP TALLINN



Na Evropskom klupskom taekwondo prvenstvu u Tallinnu, koje se održalo od 12. do 14. aprila, bh. takmičari su postigli sjajan rezultat! Zlatne medalje ponosno su nosili Džejla Makaš (TKD Novi Grad Sarajevo) u kategoriji do 46 kg i Ada Avdagić (TKD Sarajevo) u konkurenciji do 53 kg!

Srebrene medalje otišle su u ruke Benjaminu Husiću (TKD Novi Grad Sarajevo) u kategoriji seniora do 73 kg, kao i Katarini Kraišnik koja je u finalu poražena od Ade Avdagić.

Viceprvak Evrope, Erol Nući (TKD Mladost), osvojio je srebro u kategoriji do 87 kg, a Džejna Hamzić (TKD Šampion Sarajevo) donijela je bronzu u konkurenciji seniorki do 57 kg. Također, seniori TKD Novi Grad Sarajevo su zauzeli drugo mjesto u ukupnom plasmanu, dok su seniorke ovog kluba takođe bile druge! U konkurenciji seniorki, treće mjesto pripalo je TKD Sarajevo. Čestitamo svim takmičarima, trenerima, klubovima i Taekwondo savezu BiH na ostvarenim uspjesima u prethodnom periodu.

POVIJEST SE PONOVILO, SKAUTI IZBORILI POLUFINALE



“Skauti” su se ponovno plasirali u polufinale Europskog kupa, a ovaj uspjeh podsjeća na generaciju iz 2005. godine koja je predvođena Denisom Buntićem izborila isto. Sjajnim nastupom nadmoćno su pobijedili islandski Haukar rezultatom 33:26.

Ova pobjeda predstavlja jedan od najvećih europskih uspjeha RK Izviđač u posljednjim godinama! Čestitamo igračima i treneru RK Izviđač, kao i Rukometnom savezu BiH.

UČEŠĆE NA “EUROPEAN CUP RHYTHMIC GYMNASTICS - 2025”



Gimnastičarke BiH su 1.- 4. maja 2025. godine uzele učešće na “European Cup Rhythmic Gymnastics - 2025” koji se održao u Bakuu (Azerbajdžan) i ostvarile su zadovoljavajuće rezultate.

U narednom periodu bh. reprezentativke učestvuju na tri velika takmičenja a to su Seniorsko Evropsko prvenstvo koje će se održati 4-8. juna u Tallinu (Estonija), Seniorskom Svjetskom prvenstvu koje će se održati 20 - 24. avgusta 2025. godine u Rio de Janeiro (Brazil) i Svjetsko juniorsko prvenstvo koje će se održati 18 - 22. juna 2025. godine u Sofiji (Bugarska).

ZLATO ZA MAŠIĆA NA EUROPSKOM VETERANSKOM PRVENSTVU

Nakon dvije himne na Prvenstvu Mediterana (Nedim Mašić i Vlatko Buzuk), te zlatne medalje i himne na Svjetskom veteranskom prvenstvu, Nedim Mašić je na Europskom veteranskom prvenstvu, osvojio prvo mjesto i zlatnu medalju.

Takođe, Vlatko Buzuk je osvojio bronzanu medalju u veteranskoj kategoriji M60, kategorija +109.



IMAN AVDIĆ POSTAVILA NOVI DRŽAVNI REKORD



Na Četveromeču plivačkih reprezentacija u Rijeci, mlada bh. reprezentativka Iman Avdić, članica PK Sport Time postavila je novi državni rekord u disciplini 800 metara slobodnim stilom!

U izuzetno dominantnoj trci, Iman je ostavila konkurenciju daleko iza sebe, drugoplasiranu plivačicu iz Slovenije nadmašivši za gotovo 15 sekundi.

Novo najbolje vrijeme Bosne i Hercegovine u ovoj disciplini sada iznosi 8:54.57, čime je Iman potvrdila svoj status jedne od najperspektivnijih plivačica u regiji.

Čestitamo Iman, Plivačkom savezu BiH, i treneru na ovom sjajnom postignuću!

NOVA ZVIJEZDA BH. PLIVANJA: ESMA DIZIĆ RUŠI REKORDE



Mlada i talentovana plivačica Esma Dizić nedavno je ostvarila nevjerovatan uspjeh.

Esma, članica Udruženja za sport i rekreaciju Aquafit, je oborila čak osam godina star rekord na 1500 metara slobodnim stilom, koji je punih 8 godina prethodno držala sjajna Iman Avdić.

Dizić je prvi put oborila rekord u februaru na Međunarodnom plivačkom mitingu "Branko Mićin" s vremenom 20:55:12, što je već tada bio izuzetan uspjeh. Nakon toga je još jednom pokazala svoj izuzetni potencijal i ponovo oborila svoj rekord na Međunarodnom plivačkom mitingu "22 April" u aprilu mjesecu, plivajući nevjerovatnih 20:50:82 i time poboljšala svoj prethodni rezultat za skoro 5 sekundi!

Ovaj izuzetan uspjeh nije samo pokazatelj njenog talenta, već i znak da u bh. plivanju možda već sada imamo novu Iman Avdić ili Lanu Pudar. Esma Dizić je perspektivna plivačica i, iako još uvijek u kategoriji mlađih kadeta (izlazna godina), već sada dokazuje da je spremna za velike uspjehe na plivačkoj sceni.

„Ponosni smo na Esmin trud, rad i nevjerovatnu volju! Ovaj uspjeh je inspiracija svim mladim sportistima i podsjetnik da se trud uvijek isplati. Esmi želimo puno uspjeha u daljem radu i vjerujemo da je pred njom još mnogo novih rekorda i medalja“, izjavili su iz Plivačkog saveza BiH.

NOVI REKORD ZA ARIANA MILICIJU

Bosanskohercegovački rekorder u skoku s motkom, Arian Milicija iz Sarajeva, preskočio je nevjerovatnih 5,25 metara na Mitingu Sun City Classic na Univerzitetu Texas El Paso i postavio novi lični i bh. rekord, poboljšavši prethodni rezultat za 9 centimetara!

Milicija je, početkom ovog mjeseca, na takmičenju na svom Univerzitetu New Mexico, preskočio visinu od 5.16 m te je poboljšao lični i bh. rekord i potvrdio normu za Svjetske univerzitetske igre u njemačkom Bochumu, koje će se održati od 21. do 27. jula ove godine.

Milicija je, međutim, novim rekordom, koji je postigao iz trećeg pokušaja - nakon što je iz drugog pokušaja preskočio visinu od 5.06 m te propustio skakati na 5.16 m, sada ispunio i normu za nastupa na Evropskom prvenstvu za mlađe seniore (U23), koje će se od 17. do 20. jula održati u norveškom Bergenu. Norma za Bergen iznosi tačno 5.25 m.

Milicija je na ovom mitingu u El Pasu pokušao preskočiti i visinu od 5.35 m, ali je sva tri puta bio neuspješan.

U martu je napunio 20 godina i ovo mu je prva godina studija na tom američkom univerzitetu.

IZVANREDAN NASTUP DŽANA IMAMOVIĆA NA PREPONSKOM TURNIRU U HRVATSKOJ



Talentirani jahač Džan Imamović iz Konjičkog kluba Vilenjak Visoko postigao je nevjerovatne uspjehe!

Džan je osvojio prvo mjesto na grlu Casall de Fuyssieux Z i drugo mjesto na grlu Dior u utakmici "L* 1,20 m - na vrijeme", u 1. kolu CC i Batida Grand Prix, održanom na zagrebačkom hipodromu.

Jahao je za "ZZ Stables" štalu, ponosno predstavljajući Bosnu i Hercegovinu.

Ovaj uspeh ne bi bio moguć bez predanosti njegovog trenera Luke Založnika.

Ovo je samo uvod u još veće izazove — pripreme za Balkanijadu 2025. godine u Beogradu, gde će Džan biti prvi jahač iz BiH koji će se takmičiti u preponskom jahanju!

Čestitamo Džanu i njegovom timu na izvanrednim postignućima!



TURNIR MLADIH NADA SARAJEVO 2025, 6 ZLATA ZA BIH



Turnir mladih nada Sarajevo 2025, na kojem je učestvovalo više od 380 mladih džudista iz 17 zemalja održan je u aprilu mjesecu. Mlada bh. ekipa briljirala je i osvojila ukupno šest zlatnih medalja, čime je Bosna i Hercegovina zauzela drugo mjesto u ukupnom poretku.

Četiri zlatne medalje prvog takmičarskog dana osvojili su: u uzrastu do 13 godina Ali Babić (-46 kg) i Gabrijel Pandža (-55 kg), dok su se zlatnim odličjima u konkurenciji takmičara do 15 godina okitili Aya Hasan Ahmad (-36 kg) i Ajša Adilović (-40 kg), drugog dana zlatna odličja su izborili: Adna Lukač U13, -40 kg i Sara Nikolić U-15, -63 kg, što je bilo dovoljno da Bosna i Hercegovina zauzme drugu poziciju u ukupnom poretku sa šest zlatnih, deset srebrenih i isto toliko bronzanih medalja. Iako je riječ o međunarodnom takmičenju za djecu mlađu uzrasta, predsjednik Evropske džudo unije, Laszlo Toth, pohvalio je odličnu tehničku organizaciju po kojoj je Džudo savez BiH poznat.

“Imam osjećaj da smo prisustvovali jednom Grand Prixu ili Grand Slamu. Turnir je organizovan na jako visokom nivou i volio bih da mogu svima dati po jednu zlatnu medalju za uloženi rad i trud”, kazao je Toth. Ovaj turnir bio je prilika da Laslo Toth, predsjednik EJU-a, uruči posebne zahvalnice i priznanja Milanku Mučibabiću, Larisi Cerić, Aleksandri Samardžić, Ognjenu Pavloviću i Branislavu Crnogorcu.

Čestitke, sportistima, trenerima, klubovima i Judo savezu BiH.



KARLING REPREZENTACIJA BOSNE I HERCEGOVINE ZAVRŠILA EVROPSKO PRVENSTVO C DIVIZIJE NA VISOKOM NIVOU



Östersund, Švedska – Bosanskohercegovačka karling reprezentacija ispisuje nove stranice sportske istorije, ostvarivši prve pobjede na Evropskom prvenstvu C divizije. U konkurenciji devet nacionalnih timova, naša reprezentacija turnir u švedskom Östersundu završila je na šestom mjestu, sa tri pobjede i pet poraza. U posljednjoj utakmici Evropskog prvenstva C divizije u karlingu, Bosna i Hercegovina je ostvarila treću pobjedu savladavši Rumuniju rezultatom 8:4.

Iako je meč loše počeo i Rumunija povela s 4:0 nakon dva enda, BiH tim je ostao pribran i preokrenuo rezultat serijom sjajnih poteza. Posebno su se istakli Bojan Mališ duplim izbijanjem u trećem endu i skip Mak Dorić preciznim bacanjem u šestom, te Vladan Savić standardnom formom tokom cijelog turnira.

Nakon niza ukradenih poena i pritiska koji Rumuni nisu uspjeli izdržati, protivnik je predao meč u sedmom endu. Nažalost, plasman u polufinale izmakao je nakon poraza u odlučujućem meču protiv



ekipe Lihtenštajna. Ipak, ovaj nastup na evropskoj sceni predstavlja veliki uspjeh za bh. karling – kako rezultatski, tako i u smislu promocije ovog mladog sporta u našoj zemlji.

“Ostvarili smo naše prve, istorijske pobjede, i pokazali da možemo igrati sa bilo kojom ekipom u C diviziji. Igrali smo ravnopravno i bili bolji protiv Andore, Srbije i Lihtenštajna (vodili sve vrijeme meča, ali zbog nedovoljno iskustva i taktike izgubili u

osmom endu). Vrijedi istaći i odličnu atmosferu među timovima iz bivših jugoslovenskih republika, čije je druženje doprinijelo pozitivnom duhu turnira”, saopštili su iz Karling saveza BiH. “Pokazali smo da imamo potencijal i kada bismo imali mogućnost redovnog treniranja na pravom karling ledu u BiH, mogli bi postići još više”, istakao je predsjednik Saveza Miro Klepić.

Reprezentaciju BiH predstavljali su skip Mak Dorić koji igra za Švajcarski klub i takmičari Karling klubova „Slavija“ i „Pale“ iz Istočnog Sarajeva Vladan Savić, Bojan Mališ, Bojan Mačar i Siniša Karišik.

BRONZA NA EUROPSKOM PRVENSTVU U SAMBU 2025



Član Sambo kluba Neretva iz Mostara, Josip Previšić, ostvario je izniman uspjeh osvojivši brončanu medalju u disciplini Combat Sambo, u kategoriji do 98 kg u uzrastu seniora.

Posebno je važno istaknuti da je ovo već druga europska medalja za Josipa, budući da je i na Europskom prvenstvu u Izraelu 2023. godine ostvario sjajan rezultat, čime potvrđuje svoj status jednog od najperspektivnijih boraca u regiji, a ukupno peta europska medalja za Sambo klub Neretva od 2021.godine.

“Ovaj rezultat je ponos ne samo za Sambo klub Neretva i trenera Maju Češku, već i za cijeli Mostar i Bosnu i Hercegovinu. Klub svojim predanim radom, stručnim pristupom

i njegovanjem sportskih vrijednosti nastavlja nizati vrhunske uspjehe i odgajati mlade šampione. Ponosni smo na Josipa, njegovu upornost i hrabrost, te na činjenicu da Mostar i Sambo klub Neretva i dalje uspješno predstavljaju Bosnu i Hercegovinu na najvećim europskim sportskim pozornicama te stvaraju izvrsne sportaše”, izjavili su iz Sambo kluba Neretva. Čestitke Josipu, njegovim trenerima i cijelom timu Sambo kluba Neretva.

DVANAEST MEDALJA SA SVJETSKIH ZIMSKIH IGARA SPECIJALNE OLIMPIJADE U TORINU



Reprezentativci Bosne i Hercegovine donijeli su 12 medalja sa Svjetskih zimskih igara Specijalne olimpijade u Torinu – 3 zlatne, 8 srebrnih i 1 bronzanu!

Ovi rezultati nisu samo sportski uspjeh, već i snažna poruka o inkluziji i jednakim mogućnostima za sve. Također, naši sportisti su pokazali da granice ne postoje kada se vjeruje u sebe i ima podrška zajednice.

Kada Delić Selimović, izvršna direktorica Specijalne olimpijade BiH, istaknula je na konferenciji za medije da su rezultati i entuzijizam bh. takmičara bili izuzetno impresivni. Naglasila je da su na Zimskim Olimpijskim Igrama u Torinu učestvovalo 1.500 sportista iz 100 zemalja, uz veliki broj volontera. Također je dodala da naši sportisti ne doprinose samo vrhunskim sportskim rezultatima, već i inspirišu zajednicu na prihvaćanje različitosti i gradnju društva koje promovise jednakost svih sportista.

Zajednički cilj ostaje promijeniti svijest o onome što osobe s invaliditetom mogu postići. Hvala svima koji podržavaju ovu značajnu priču sportskog duha!

Čestitke sportistima, trenerima, i Savezu specijalne olimpijade Bosne i Hercegovine!

EU PROJEKTI

EVROPSKA SEDMICA SPORTA SVEČANO OTVORENA U CAZINU!



Evropska sedmica sporta 2025 svečano je otvorena u Cazinu, u okviru kampanje #BeActive i projekta „EU4Youth - European Week of Sport Beyond Borders in the Western Balkans“, finansiranog iz IPA programa uz podršku Evropske komisije. Inicijativu provode Olimpijski komitet Bosne i Hercegovine i Ministarstvo porodice, omladine i sporta Republike Srpske u saradnji sa Ministarstvom civilnih poslova BiH, s ciljem promocije sporta i fizičke aktivnosti tokom cijele godine.

Prva aktivnost bila je XVI Međunarodni malonogometni turnir „Djeca Bosne“ u organizaciji Gradskog sportskog saveza Cazin i Sportskog saveza Unsko-sanskog kantona, na kojem je učestvovalo preko 400 djece iz BiH i Hrvatske. Turnir je svečano otvorio generalni sekretar Olimpijskog komiteta BiH, Said Fazlagić, istaknuvši važnost sporta za povezivanje generacija i razvoj vrijednosti kod mladih.

Zamjenik gradonačelnika Cazina, Mustafa Ružnić, naglasio je da je ovo početak niza aktivnosti koje će omogućiti mladima da postanu sportski ambasadori grada i šire društvene vrijednosti. Kampanja #BeActive ove godine donijet će događaje u sedam gradova širom BiH, a sljedeći je Pale gdje će biti održano takmičenje u karlingu. Centralni događaj Evropske sedmice sporta održava se od 23. do 30. septembra širom Evrope.

Kompletnu vijest pročitajte [OVDJE](#), a video prilog pogledajte na [OVOM LINKU](#).

PRIJEM U KABINETU GRADONAČELNIKA CAZINA NERMINA OGREŠEVIĆA



Povodom otvorenja Evropske sedmice sporta 2025, u kabinetu gradonačelnika Cazina, Nermina Ogriševića, održan je prijem na kojem su razgovarali o budućim projektima koji će doprinijeti jačanju sporta i sportskog sistema u Bosni i Hercegovini.

Generalnog sekretara Olimpijskog komiteta BiH, dr. sci. Saida Fazlagića, primio je savjetnik gradonačelnika Mustafa Ružnić.

„Čestitam organizatorima, predsjedniku Gradskog sportskog saveza Cazina i Sportskog saveza USK, Emiru Dautoviću, na izvrsnom domaćinstvu. Nadam se da ćemo ponovo biti partneri u budućim projektima. Sport ima nevjerovatnu moć da spaja generacije i promoviše istinske vrijednosti među mladima, što je i ključna poruka Evropske sedmice sporta“, izjavio je generalni sekretar Fazlagić.

Dodao je: “Ovakvi događaji su značajni jer su posvećeni promociji olimpizma i olimpijskih vrijednosti”, prenoseći pozdrave u ime predsjednika OK BiH, potpredsjednika OK BiH i Izvršnog komiteta OK BiH.

Dr. sci. Said Fazlagić je prilikom svečanog otvaranja događaja naglasio i značajnu ulogu Ministarstva civilnih poslova BiH, na čelu sa ministricom Bošnjak, koji kao koordinatori aktivno učestvuju u realizaciji projekta. Svojim zalaganjima doprinijeli su uspjehu ovog značajnog sportskog događaja.



EVROPSKA SEDMICA SPORTA NA PALAMA



Karling savez Bosne i Hercegovine i Kulturno-sportski centar Pale bili su domaćini drugog događaja Evropske sedmice sporta i kampanje #BeActive 2025. Ovaj projekat realizuje se uz finansijsku podršku Evropske komisije i IPA programa, a implementiraju ga Olimpijski komitet Bosne i Hercegovine i Ministarstvo porodice, omladine i sporta Republike Srpske, uz koordinaciju Ministarstva civilnih poslova BiH. U okviru događaja, osnovci iz Istočnog Sarajeva učestvovali su u mini takmičenju u uličnom karlingu!


Načelnik opštine Pale, Dejan Kojić, poželio je dobrodošlicu učesnicima. U ime Ministarstva civilnih poslova BiH, prisutnima se obratio Velibor Lazarević, šef Odsjeka za praćenje izrade i provođenja strategija, projekata i programa u sportu istakao važnost implementacije Evropske sedmice sporta, naglasivši značaj karlinga kao olimpijskog sporta koji je u Bosnu i Hercegovinu došao s održavanjem EYOF-a i ostao prisutan kroz osnivanje Karling saveza BiH, još jednog člana Olimpijskog komiteta BiH.

„Upravo promoviramo jedan lijep sport koji će, nadamo se, jednog dana dovesti i olimpijadu u Bosnu i Hercegovinu”, istakao je Lazarević.

Generalni sekretar Olimpijskog komiteta BiH, dr. sci. Said Fazlagić, istakao je: „Cilj Evropske sedmice sporta je istaći važnost i benefite fizičke aktivnosti i omogućiti učestvovanje u različitim sportovima.“

Na ovom uzbudljivom događaju, mladi su imali priliku da se zabave, upoznaju s pravilima igre i takmiče, a treneri iz domaćih karling klubova pokazali su im tehnike ove fascinantne discipline. Od marta do oktobra, Olimpijski komitet BiH planira devet sportskih događaja širom Bosne i Hercegovine! Nastavljamo sa obilježavanjem Evropske sedmice sporta, krajem aprila, uz kajak na Vrbasu u Banjoj Luci! Pridružite nam se i budite aktivni!

ZAVIRITE U DRUŠTVENE MREŽE OK BIH (klikom na sliku)



Pratite nas na društvenim mrežama:
(klikom na ikone)



©2025. Olimpijski komitet Bosne i Hercegovine.
Sva prava zadržana.
www.okbih.ba

Specijalnu zahvalnost dugujemo sponzorima i partnerima OK BiH.
Klikom na logo posjetite njihove oficijelne stranice.



Moja priča.

